

1 TIMOTI

Pepa Paulo ingere munga pa Timoti

Timoti nde tamâta limoa tonje munga iyoka kuku Paulo itula pâri ara panzi tamâta lâ lawea pinde (Pâri Tamâta 16:1-5). Njineŋa ilâ imo Efesus lawea ikai poe panzi kalo-tawana tamâta ŋgu simo ŋinde, aku itula Maro Kindeni kawa ŋgua panzi. Paulo ku Timoti rua simo nambwe nambwe sonde, kala Paulo ingere ŋgua ŋine ŋana ipu tini kaika papa wa ipanana i ŋana ikatonanzi ŋgu wa. Ipai Timoti tu ma ipakotona sonde ŋananzi pananâŋa tamâta laŋeŋa, aku itula ŋgua papa ŋana tamâta mana ikura tu imo katonâŋa panzi Maro Kindeni ne ŋgu.

¹ Naŋa Paulo, Yesu Kirisi ne pâri-tamâta naŋa. Nenda Yautâŋa Tamwata Maro Kindeni, aŋga Yesu Kirisi, ina tamâta ŋinde kinda uru tao tininda papa, kinzi rua munga sipatea naŋa, kala apâŋga amo pâri-tamâta. ² Naŋa aŋgere ŋgua lâ pepa ŋine tini imâ pa noko Timoti. Kinda rua kalonda tawana Yesu, aku ŋana nenda kalo-tawana ŋine kâ, ande noko kumo kutogo naŋa natuŋgu mao. Tamânda Maro Kindeni ŋga nenda Maro Nalae Yesu Kirisi rua nenzi wisi-wisi wa kalo-sukâŋa wa wisi-pisi wa imo kuno.

Ara ŋana kinda ma talelea ŋgua laŋeŋa rârâni

³ Njine naŋa atu aporo ŋgua kaŋa taituni pa noko kilo, itogo aporo pano munga, lâ zo ŋinde naŋa alâ pa Masedonia tâno. Naŋa ilonŋu tu noko ma kumo

ndainani nâ lâ Efesus lawea, aku kutula ngua kaika panzi tamâta pinde nana sipile nenzi mâsi nana siporo ngua lanenja kâ, lâ zo nana sipanananzi tamâta nana Maro Kindeni ne ngua kâ. ⁴ Aku kuporo ngua kaika panzi tu ma sipile nenzi mâsi nana sitapâri timbunzi nenzi usi kaa nâ, aku sipile nenzi mâsi nana siveta ngua kie-kie rârâ siporo nana timbunzi nanzi kâ. Ngua kaŋa mine uru iveta ngua nâna ipânŋa, aku ŋinde ikura nana isuka nenda kalo-tawana nana tasama Maro Kindeni ne ilokalo ara kâ, ande tia. ⁵ Ambo tamâta ŋinde ma sipile nenzi mâsi potomule ŋinde, ande nenzi kalotawana ma keno mao pa Yesu Kirisi, aku ma simo ilonzi mbâra-mbâra lâ Maro Kindeni nao, aku ma sipasama tu nenzi soki tonŋe keno tia. Nŋinŋa kinzi ma sio nenzi tini-mwasa ilâ panzi kalotawana tamâta. ⁶ Tamâta pinde sipile kalo-tawana mao ne vetânŋa ara ŋinde, kala ŋine kinzi siporo ngua kaa kaa mine. ⁷ Kinzi ilonzi tu sipanananzi tamâta pinde nana Maro Kindeni ne ngua tukuŋa kâ, aku ilonzi keno tu nenzi ngua ndoni nde mao nâ. Kinzi uru situla ngua kaika, andeta warakanzi sizizâla nana nenzi ngua ŋinde ne duvi.

⁸ Kinda tasama tu Mose ne ngua tukuŋa nde arando. Taitu kinda ma kalonda ŋgere sondo nana tukuŋa ŋinde ne duvi kâ. ⁹ Kinda tasama tu ngua tukuŋa ne wurâta ŋandai nana itula nzâla panzi tamâta arara nŋa. Ngua tukuŋa ne wurâta nde nana itula nzâla panzi tamâta ŋinde uru sipu ngua tukuŋa ututu ku siveta taŋa-kaika ne vetânŋa. Kinzi sipu mulinzi pa Maro Kindeni ku siveta vetânŋa potomule nâ. Kinzi simege nana Maro Kindeni

ku siveta mâsi ara pinde, ande tia. Kinzi uru siveta mâsi sakamao pinde mine: kinzi sipunzi tinanzi tamanzi pâta simâte, aku sipunzi tamâta pinde pâta simâte tona; ¹⁰ kinzi tamâne sipalulua tininzi ilâ potomule panzi taine pinde, aku sipalulua warakanzi tininzi mine nâ kunzi nawalanzi tamâne tona; kinzi sipanawenzi tamâta pinde ku sivetanzi sikai wurâta kaa nâ; aku siporo ngua lanjeŋa wa siveta ngua pânja kaa nâ wa. Mao nâ, ngua tukuŋa ne wurâta nde ŋana itula nzâla panzi tamâta ea uru siveta mâsi potomule ndia ŋandai ipakura kuku ilo-kalo ara. ¹¹ Andeta Maro Kindeni ne ilo-kalo ara ikeno pâri ara tini, pâri ara ŋinde i muŋga itula pa naŋa kala uru aporo atula pwataki. Pâri ara ŋinde itula Maro Kindeni kilala pwataki tu i nde Ara Tamwata, aku nenda paneâŋa ilâ pa i nâ.

Paulo kawa ndaŋge pa Maro Kindeni, ŋana tu i kalo sukâŋa ŋana i kê

¹² Muŋga, nenda Maro Yesu Kirisi imora naŋa tu naŋa akura ŋana aveta wurâta papa i kê. Mine kala i ne walo ilua naŋa lâ ŋana atulâ i kawa ngua kê. Ipateana ŋana aveta i ne wurâta ŋine kê. Mine kala naŋa kawâŋgu ndaŋge papa i. ¹³ Mao nâ, muŋga naŋa aporo ngua pavaligiŋa papa i, aku aveta keŋgu sakamao panzi i ne tamâta apunzi tona. Andeta isama tu naŋa azizâla ŋana i kê, aku ŋandai kalongu tawana i ŋga, kala aveta vetâŋa ŋinde. Mine kala i kalo sukâŋa ŋanana. ¹⁴ Aku nenda Maro Ŋalae ne wisi-wisi ŋalae nde imâ ndo pa naŋa lâ, aku igagati ilongu kalongu ŋana ao

nanenġu kalo-tawana ilâ papa i nâ. Aku i ne wisiwisi ġinde igagatina ġana tiningu mwasa panzi kalo-tawana tamâta tona. Kalo-tawana wa tinimwasa kie mine uru ikeno pa kinda tamâta rârâni ġine tapaipa kuku Yesu Kirisi.

¹⁵ Yesu Kirisi indue imâ tâno kulu ġana iyautenzi kiesaka tamwatanzi piti lâ kondoma ilo. Ngua ġinde nde mao kano, aku ara ġana tamâta rârâni ma siloġo ku kalonzi tawana. Aku naġa warakâġgu muġa aveta kiesaka ġalae ndo, kala amo atogo kiesaka tamwatâġgu mine, apolenzi tamâta rârâni ġana aveta kiesaka kâ. ¹⁶ Mao nâ, naġa apolenzi tamâta rârâni ġana aveta kiesaka kâ. Andeta Maro Kindeni kalo sukâġa ġanana, ġana tu itu itula pwataki panzi tamâta ma sipâġga mulimuli ġinde tu Yesu Kirisi nao mwasa ndo panzi kiesaka tamwatanzi. Aku tamâta ma sipâġga mulimuli ġinde ma simora Yesu ne vetâġa ġinde, kala ma kalonzi tawana i, ku ma sikai via ġana simo ara mine ku simo nâ. ¹⁷ I imo Koipu Nalae ikura zo zo ku imo nâ. I ma nao tia, ande tia ndo. Aku kinda tâno tamâta takura tu matânda tamora i kâ, ande tia. Maro Kindeni simbo nâ nde Maro Mao. Mine kala zo rârâni kinda ma tapanea i tasuka ġa kâki. Mao.

Paulo itu ġgua pa Timoti tu ma ipara kaika ġana ipu vetâġa sakamao ndue

¹⁸ Timoti, naġa natuġgu noko, naġa ao nanenġu ġgua ġine imâ pano. Kinzi ġgua-tulâġa tamâta pinde muġa situla ġgua pwataki ġana noko kâ, aku nanenġu ġgua ġine nde iyoke nenzi ġgua ġinde. Ambo noko ma kalo ġgere ġana ġgua ġinde kâ, ande ġinde ma ipu tini kaika pano lâ zo ndia noko

kupara kaika nana kupu vetâna sakamao ndue kâ.
¹⁹ Ara nana noko ma kalo tawana Yesu kaika lâ paraña ninde ilo, aku kupasama sonde lâ tamwata ilo kalo tu noko ne soki tonje tia lâ Maro Kindeni nao. Maro Kindeni uru itu ngua kaika lâ tamâta ilonzi tu ma sipile nenzi vetâna soki, andeta kinzi pinde tininzi pwâka tu sipile nenzi vetâna ninde. Mine kala nenzi kalo-tawana nde imbe ndo lâ, itogo wânga ikâki pitiku kulu ku ipwa pwataki mine. ²⁰ Tamâta rua, Himeneus ku Arisande rua, muŋga siveta mine, kala naña aonzi rua silâ pa Sadana mbau ilo, nana ma kalonzi ngere sonde ku sipile nenzi mâsi nana siporo ngua pavaligiña pa Maro Kindeni kâ.

2

Ara nana kinda ma tano pa Maro Kindeni tu iveta kie ara panzi tamâta rârâni

¹ Naña ilonju tu noko ma kuveta vetâna njine muŋga lâ nga; kupanananzi kalo-tawana tamâta tu ma kawanzi ndanje pa Maro Kindeni nana tininzi pinde rârâni, ku sino kaika pa i tu ma iveta kie ara panzi.

² Ara nana kinda ma takai noña kaika pa i tu ma iveta kie ara panzi koipu nalanala wa kinzi tamâta mbâna-mbâna wa. Ambo i ma iveta mine, ande kinda rârâni ma tamo ara, aku ma tamo tava wisinda pisi nâ. Ninenja kinda ma tapono muli pa vetâna ara rârâni Maro Kindeni ilo papa ninde, aku ma taveta vetâna ara nâ lâ i nao. ³ Noña kie mine nde ara ndo lâ nenda Yautâna Tamwata Maro Kindeni nao. Mao nâ, i tini mwasa ndo nana noña kie mine. ⁴ I ilo tu iyautenzi tamâta rârâni piti

lâ kondoma ilo, aku i ilo tu kinzi ma sisama ngua mao duvi tona. ⁵ Kinda tasama tu Maro Kindeni simbo nâ nde Maro mao. Aku tasama tu tamâta taitu nâ imandi kinda tamâta nga Maro Kindeni ngininda nana ilulu Maro Kindeni ne wisi-nâna kê, aku tamâta ninde nde Yesu Kirisi tamwata. ⁶ Maro Kindeni munğa ipatea zo pa Yesu Kirisi, aku lâ zoni ndaina nâ, ande Yesu ipile tamwata ne via ku imâte nana ikonzi tamâta rârâni piti lâ kondoma ilo. Aku vetâna ninde itula Maro Kindeni kilala pwataki pa kinda. ⁷ Maro Kindeni ipatea naņa tu amo i ne pâri-tamâta, aku wurâta ilana nana atula i kawa ngua ninde pwataki. Naņa aporo mao, alâņe tia. I wurâta ilua naņa nana apanananzi tamâta lâ tinikoa ngu, nana nenzi kalo-tawana ma ilâ mao pa Yesu Kirisi.

⁸ Mine kala naņa ilonġu tu kinzi tamâne simo nia ndoni ma sisuka mbaunzi kêki ku sikai noņa. Naņa ilonġu tu kinzi ma sio ilonzi ndo ilâ pa Maro Kindeni, aku ma sipile mâsi nana wisinzi nâna wa sipambita wa.

Mâsi nana siveta vetâna ara kê ande itogo taine nenzi sinġara mao

⁹ Aku naņa ilonġu tu kinzi taine ma sisawa pa-sawaņa wa sipita lalava sondo, nana itula pwataki tu kinzi sipatawa warakanzi tininzi. Naņa tininġu pwâka tu kinzi ma sipalaki kulunzi ku sisinġa kulunzi pwau nga tininzi lâ kelekele kulu nalaie koņa, itogo mbote-mbote arara wa mira “gol” wa. ¹⁰ Ambo taine ilonzi tu sipono muli pa Maro Kindeni ku sipanea i, ande ara nana kinzi ma siveta vetâna ara nâ panzi tamâta. Aku nenzi

vetâña arara ñinde ma keno itogo nenzi singâra ara mwasina.

¹¹ Naña ilonngu tu kinzi taine ma sipatawa warakanzi tininzi ku sisae kawanzi, aku sipanâna nâ ñana Maro Kindeni ne ñgua kê. ¹² Naña uru asâu panzi taine ñana sikai poe panzi tamâne ku sipanananzi ñana Maro Kindeni ne ñgua kê, ande tia. Ara ñana kinzi taine ma kawanzi buu ku sipalongo pa ñgua nâ. ¹³ Ñana tu Maro Kindeni iveta tamâne Adam munga lâ, ñineña iveta taine Eva muli. ¹⁴ Aku Adam ñandai kalo tawana ñgua lanjeña nga. Taine nâ kalo tawana ñgua lanjeña kala iveta kiesaka. ¹⁵ Andeta Maro Kindeni ne pateâña ikeno mine tu kinzi taine nâ ma sipaguguanzi lâlu. Ambo nenzi kalo-tawana ilâ pa Yesu Kirisi ikura zo zo, ku siveta vetâña soki tonje tia lâ Maro Kindeni nao, ku tininzi mwasa nâ panzi tamâta, ande Maro Kindeni ma iyautenzi piti lâ kondoma ilo.

3

Ñgua ilâ panzi tamâta mbâna-mbâna uru sikai poe panzi katonâña

Titi 1:5-9

¹ Ñgua ñine nde mao kanaño: ambo tamâta tonje ilo tu ikai poe panzi ñgu nenzi katonâña, ande wurâta itu iveta ñinde nde wurâta ara ndo. ² Ambo taitu nanenngu ñgua pinde ilâ pa tamâta ea itu imo mbwananâña panzi katonâña kê. Ñgua ñinde nde mine: i ma iveta vetâña soki tonje tia; i ma ikai kaiwa taine taitu nâ; i ma ipakatonâ tamwata sondo ñana kiesaka kê; i ma ikai poe sondo pa tamwata ne ilo-kalo; aku i ne vetâña rârâni nde ma

ara nâ. I ma ikainzi tamâta lombo ku ikatonanzi simo sondo lâ i ne luma ilo; aku i ma isama pâta ɲana ipanananzi tamâta ɲana Maro Kindeni kawa ɲgua kê. ³ I ma imo tamâta ɲana inu lââ kaika ku idauda, ande tia; i ma wisi nâna walele ku ipara kunzi tamâta tia; i ma nao mwasa nâ panzi tamâta; aku i ma ilo ɲalae koɲa ɲana igona mbaliɲa kê, ande tia. ⁴ I ma ikatonanzi i tamwata kaiwa-natu sondo, ku ma ipanananzi natu sondo ɲana siloɲo i ne ɲgua ku simege ɲana i kê. ⁵ (Ambo tamâta tonɲe ikura tu ikatonanzi i kaiwa-natu sondo tia, ande i ma ikura ɲana ikatonanzi Maro Kindeni ne ɲgu, ande ma tia.) ⁶ Kalo-tawana tamâta wasaseki tonɲe ikura ɲana ikai poe panzi katonâɲa kê, ande tia. Tia ma i ilo tu i nde tamâta ara ndo, aku ma ipasuka tamwata tini. Aku ɲana ɲinde kê, Maro Kindeni ma io i lâ ɲgua nia, itogo munga io Sadana lâ ɲgua nia mine. ⁷ Aku katonâɲa nenzi poe tamâta ma imo tamâta mine: kinzi tamâta simo niaka ɲana Maro Kindeni ne ɲgu kê, ande ma uru siporo ɲgua ara nâ ɲana poe tamâta ɲinde kê. ɲana tu ambo i ma ipakatonâ tamwata ne vetâɲa tia, ande kinzi ma siporo ɲgua sakamao ɲana i kê, aku Sadana ne nimbu ma ikai i kaika lâ.

ɲgua ilâ panzi ɲgu nenzi katonâɲa

⁸ Aku mine nâ, nanenɲu ɲgua pinde ilâ panzi ɲgu nenzi katonâɲa tona. ɲgua ɲinde nde mine: kinzi ma sipakatonâ warakanzi sondo ɲana nenzi vetâɲa kê; kinzi ma simo togo memelanzi rua tia; kinzi ma sinu lââ kaika ku sidauda tia; aku kinzi ma ilonzi ɲana sitapa tamâta pinde nenzi mbaliɲa saɲenzi, ande tia. ⁹ Kinzi ma kalonzi

tawana ngua mao rârâni Maro Kindeni muŋga it-ula pwataki ŋinde, aku ma sipasama lâ warakanzi ilonzi kalonzi tu nenzi soki tonje tia lâ Maro Kindeni nao. ¹⁰ Miki ma kakai samâŋa panzi ŋana nenzi vetâŋa kâ muŋga lâ ŋga. Ambo siveta wurâta sondo, ande ma sikura ŋana sikai katonâŋa panzi kalo-tawana tamâta.

¹¹ Aku ngua pinde kala ilâ panzi taine nenzi katonâŋa mine nâ. Kinzi ma sipakatona warakanzi ŋana nenzi vetâŋa uru siveta ŋinde kâ; kinzi ma siporo situ tamâta ŋguananzi tia; kinzi ma sipakatona warakanzi sondo ŋana kiesaka kâ, ku ma siveta nenzi wurâta rârâni sondo ndo.

¹² Ngu nenzi katonâŋa nde ma imo tamâta mine: ikai kaiwa taine taitu nâ, aku uru ikatonanzi i tamwata kaiwa-natu sondo. ¹³ Ambo ngu nenzi katonâŋa ma siveta nenzi wurâta ara, ande tamâta ma siporo ngua ŋananzi mine tu, “Kinzi nde tamâta ara”. Njineŋga katonâŋa ŋinde ma siruru tia ŋana situla nenzi kalo-tawana pwataki tu kinzi kalonzi tawana Yesu Kirisi.

Ngua ŋalae ŋana Yesu Kirisi kâ

¹⁴ Timoti, naŋa ilonju tu amâ walele amorano, andeta ara ŋana angere ngua pinde pano lâ pepa tini tona. ¹⁵ Mine kala, ambo naŋa akura tu amâ walele tia, ande noko ma kusama sondo ŋana vetâŋa arara Maro Kindeni ilo tu i ne tamâta ma siveta ŋinde. Kinda tamo Maro Kindeni Via Tamwata ne tamâta, tatogo i natu wukale mine, aku kinda ngu njine uru takatona i ne ngua mao ku tatula pwataki. ¹⁶ Kinda tasama tu ngua mao Maro Kindeni itula pwataki ŋinde nde ngua ŋalae tina. Ngua ŋinde nde mine: “Kirisi indue imâ ipâŋga

tâno kulu itogo tamâta mine, aku i ne mandin̄a lâ mater̄a nianzi itula pwataki tu i nde Maro N̄alae. Kinzi an̄elo rârâni nde simora i kilala pwataki, an̄ga ne kalo-tawana tamâta nde silâ situla i parina panzi tamâta ngu ndoni, an̄ga tamâta rârâ pa tâno ndoni nde kalonzi tawana i. Maro Kindeni ikai i kâki lâ samba ilo, aku imo ikai Maro N̄alae.”

4

Ngua lajeŋa kie-kie uru izavaru tamâta ilonzi kalonzi

¹ Koroani Sapâŋa itula ngua pwataki tu lâ zo muli ŋana tâno ne zo marumbu kâ, ande tamâta pinde ma sipile nenzi kalo-tawana. Kinzi ma sipalono pa ngua ŋinde koroani lajeŋa sipanananzi tamâta, ku ma sipono muli pa koroani saka nenzi ngua ŋinde. ² Lajeŋa tamwatanzi pinde ma situla ngua lajeŋa panzi kalo-tawana tamâta. Tamâta ŋinde sipayaula warakanzi ilonzi kalonzi marumbu lâ, kala sizizâla tu nenzi vetâŋa nde kiesaka. ³ Lajeŋa tamwatanzi ŋinde ma situ kaika panzi tamâta tu ma sipakâe kaiwanzi tia, aku ma situ kaika panzi tu ma sika kâpwa pinde tia tona. Andeta Maro Kindeni iveta kâpwa rârâni ŋinde pa kinda tu taka. Kinda kalonda tawana i, aku tapanâna lâ ŋana ngua mao kâ. Mine kala kinda takura ŋana takai kâpwa ŋinde, aku taka tava kawânda ndan̄ge papa i. ⁴ Kinda tasama tu kekekele rârâni Maro Kindeni muŋga iveta ŋinde nde kekekele ara nâ. Kinda ma tamora ŋinde tu kekekele sakamao ndimo. Kinda takura tu kawânda ndan̄ge pa Maro Kindeni, ku takai taka, ⁵ ŋana tu Maro Kindeni kawa ngua tava

nenda nonja iveta kelekele rârâni wa kâpwa rârâni wa ipânja zuzuli lâ i nao.

Paulo itu ngua pa Timoti tu i ma imo itogo Yesu Kirisi ne wurâta tamâta ara mine

⁶ Timoti, ambo noko ma kutula ngua njinde pwataki panzi kalo-tawana tamâta, ande noko ma kumo Yesu Kirisi ne wurâta tamâta ara. Kupakatonona tamwata ne ilo-kalo sondo, aku kupono muli pa Maro Kindeni ne ngua mao tava ne ngua njinde munga sipananano kala uru pwoka muli njinde.

⁷ Noko ma kupu muli papa usi tapârîja kaa nâ tamâta pinde uru sitapâri njinde, aku kupanâna sondo njana kuveta vetâja ara nâ lâ Maro Kindeni nao. ⁸ Ambo kinda ilonda tu taveta karaenda ipânja kaika, aku tapatogo tininda ikura zo rârâni, ande njinde ma ivila kinda njalae koja tia. Andeta kulonjo nga; ambo kinda ma taveta vetâja ara lâ Maro Kindeni nao ikura zo rârâni, ande njinde ma ivila kinda njalae tina. Vetâja njinde ikura tu ivila kinda njana tamo ara lâ zo njine tamo tâno kulu wa lâ zo muli tona.

⁹ Ngua njinde nde mao kanaanjo, aku ara njana tamâta rârâni ma silonjo ku kalonzi tawana.

¹⁰ Nanayoni kinda tao nenda kalo-tawana ilâ sondo ndo pa Maro Kindeni, ina Via Tamwata. I ilo tu iyautenzi tamâta rârâni piti lâ kondoma ilo, aku ina uru iveta mine nâ pa kinda tamâta njine kalonda tawana i mao. Kinda nenda kalo-tawana keno mine, aku njana njinde kâ kinda uru tao tininda papa i ku tamakâsa njana taveta nenda wurâta njine sondo.

¹¹ Noko ma kutula ngua njinde pwataki panzi kalo-tawana tamâta, aku kupanananzi tu ma soka

muli. ¹² Kinzi uru simora noko tu tamâta lâlu, andeta naŋa tiningu pwâka tu kinzi ma ilonzi tu noko nde tamâta kaa nâ. Noko ma kuveta mâsi ara nâ, aku kutula nzâla sondo panzi kalo-tawana tamâta. Kutula nzâla panzi ŋana siporo ŋgua ara kâ, aku kutula nzâla panzi ŋana siveta vetâŋa ara nâ tona. Kutula nzâla panzi ŋana tininzi mwasa ndo panzi tininzi pinde kâ, aku kutula nzâla panzi ŋana kalonzi tawana Maro Kindeni kâ tona. Aku kutula nzâla panzi ŋana sipile vetâŋa potomule ndoni kâ.

¹³ Noko ma pwai wurâta sondo ŋana kupono Maro Kindeni ne ŋgua ŋinde ikeno lâ pepa tini panzi tamâta, aku kutula ŋgua ŋinde duvi pwataki panzi wa kupanananzi sondo wa. Kuveta mine lee, ikura lâ zo ndia naŋa ma amâ apâŋga amo kuno.

¹⁴ Noko ma kumbariri ŋana kuveta wurâta ŋinde kâ ndimo, ŋana tu Maro Kindeni muŋga walo ilano, itogo wisi-ara ŋana noko ne wurâta ŋinde kâ. Iveta mine lâ zo ŋinde ŋgu nenzi katonâŋa situla Maro Kindeni kawa ŋgua pwataki ŋana noko kâ, ku sio mbaunzi kâki noko kulu situ nzâmbe pano.

¹⁵ Ikura zo rârâni, noko ma pwatona ne wurâta ŋinde sondo. Ambo noko ma kuveta wurâta ŋinde kaika, ande tamâta rârâni ma sisama tu muŋga noko kumo wurâta tamâta ara mwasa, aŋga ŋine kupâŋga wurâta tamâta ara ndo. ¹⁶ Kupakatona sondo ŋana noko tamwata ne vetâŋa wa ŋgua ndia kupanananzi tamâta wa. Ambo noko ma kumandi kaika ndo ŋana kuveta mine, ande noko ma kupavila tamwata, ku ma kuvilanzi tamâta ŋinde uru siloŋo noko ne ŋgua mine nâ.

Paulo itu ngua pa Timoti tu ma iveta vetâña kie taituni panzi tamâta itogo uru iveta panzi i see mine

¹ Noko ma kumbitanzi tamâne kokoña ndimo. Ambo kinzi ma siveta vetâña soki tonje, ande kuvetanzi sondo ku kuporo ngua mwasa nâ panzi, itogo uru kuveta pa noko tama mine. Aku noko ma kuveta vetâña kie taituni panzi tamâne limoa, itogo uru kuveta panzi noko tamwata tai-tua mine. ² Aku noko ma kuveta vetâña kie taituni panzi taine kokoña itogo uru kuveta pa noko tina mine. Aku kuveta vetâña kie taituni panzi taine taipa, itogo uru kuveta panzi noko mwane mine. Noko ma kuveta vetâña potomule panzi taine taipa ndimo.

Ea ma ikatonanzi taine mwala mwala

³ Ambo taine mwala tonje simbo nâ imo, ande ara, kupanananzi ngu ñana sivila i ku siveta vetâña rârâni sondo nâ papa. ⁴ Andeta kulonjo ñga; ambo taine mwala tonje natu-timbu simo, ande ara ñana kinzi ñinde ma sipanâna sondo ñana ñine kâ: nenzi wurâta ñalae lâ Maro Kindeni nao nde ñana sikatona warakanzi seenzi sondo muñga lâ ñga. Lâ nenzi vetâña ñinde, ande kinzi ma sikatu tinanzi tamanzi wa timbunzi nenzi wurâta kulu panzi, ñana tu muñga kokoña ñinde sikatona kinzi mine. Aku nenzi vetâña ñinde ma itula pwataki tu nenzi kalo-tawana nde mao. Maro Kindeni ilo ara ndo ñana vetâña mine kâ. ⁵ Ambo taine mwala tonje simbo nâ imo, ande ara ñana ma sikatona taine ñinde sondo, ñana tu i kalo tawana Maro Kindeni, aku uru io tini ñana Maro Kindeni tu ma ikea ñana i kâ. Aku ikura zo rârâni, lâ kari wa mbo wa, i

uru ino pa Maro Kindeni nana isuka i kâ. ⁶ Andeta kulonjo nga; ambo taine mwala tonje ilo njalae nana tano njine ne vetâna kâ, kala itambira ne mbaliña ku indeka potomule, ande njinde itogo i ne kalotawana imâte lâ. ⁷ Aku noko ma kupanananzi ngu tona nana sipaveta kuku nanenngu ngua njine, nana ma simo sondo nâ. Ambo kinzi ma simo sondo mine, ande tamâta tonje ma ikura nana iporo ngua soki njananzi, ande tia. ⁸ Noko kalo ngere sondo nga; ambo tamâta tonje ikatonanzi i tamwata see wa i see katiñe wa sondo tia, ande ne mâsi njinde itula i kilala pwataki tu i ipu muli pa ne kalotawana marumbu lâ. Opopo, kinzi tinikoa nandai uru siveta vetâna soki mine pa seenzi nga!

⁹ Noko ma kungere taine mwala mwala rârâni njanzi lâ pepa tini nana ngu ma sikatonanzi kâ, mine ndimo. Kungere taine mwala njine nâ na lâ pepa tini: ipole mbwera tamâta nato (60) lâ; i munğa imo kuku kaiwa tamâne simbo nâ; ¹⁰ i munğa ikatonanzi natu sondo; i uru isuanzi tamâta lombo soka lawea pinde simâ; i uru ikai kuleña panzi kalotawana tamâta nana ipua kenzi kâ; i uru ivilanzi tini pinde nana nenzi malia kâ; aku i uru ilo ndo nana iveta vetâna ara pinde tona. Ambo tamâta uru situla taine koña tonje parina tu i nde taine nana iveta vetâna ara mine kâ, ande ara, noko ma kungere taine njinde na lâ pepa tini nana ngu ma sikatona kâ.

¹¹ Andeta noko ma kungere kinzi taine taipa simo mwala njinde njanzi lâ pepa njinde tini ndimo. Nana tu muli kinzi ma ilonzi kâki nana sikâe kilo, aku ma sipu mulinzi pa Yesu Kirisi. ¹² Mine nde muli Maro Kindeni ma ipare nia panzi, nana tu

sitoto nenzi ngua pânja utu lâ. * ¹³ Andeta njinde nâ tia; kinzi taine taipa simo mwala njinde uru sikai wulitia tona, aku soka potomule silâ pa luma pinde. Andeta kinzi uru sikai wulitia nâ tia; kinzi ilonzi koņa nana situ tamâta nguananzi tona, aku sipete silâ wa simâ wa, siporo ngua nao-muli wa ngua ara tia wa. ¹⁴ Mine kala nanja ilongu tu taine taipa simo mwala njinde ma sipakâe kilo, aku ma sikainzi nenzi vâsa ku sikatona warakanzi nenzi luma. Ambo siveta mine, ande ara, kazânja tamâta tonje ma ikura nana imora nenzi vetânja soki tonje ku iporo ngua potomule nana kinda kalo-tawana tamâta kâ, ande ma tia. ¹⁵ Noko kusama tu taine taipa pinde kaiwanzi simâte lâ, aku sipile nenzi kalo-tawana ku sipono muli pa Sadana.

¹⁶ Ambo taine mwala tonje tina tâku tai tâku nitâpi tâ nde kalo-tawana taine, aku taine njinde uru imo kuku, ande ara nana kalo-tawana taine njinde ma ikatona taine mwala njinde. Ambo iveta mine, ande ma kalo-tawana tamâta ngu nenzi malia nana sikatona taine mwala njinde kâ, ande ma tia. Njinejga ngu ma ikura tu ikatonanzi taine mwala mwala njinde simo simbonzi nâ.

Kinda ma kulu talanzi katonânja ea uru siveta wurâta ara

¹⁷ Ara nana kalo-tawana tamâta ngu ma kulu ara silanzi katonânja ea uru siveta nenzi wurâta ara nâ. Aku ara nana kulu njinde ma kâki panzi katonânja njinde uru situla Maro Kindeni ne ngua

* **5:12:** Nenzi mâsi nde mine; lâ zo ndia taine mwala tonje isâu panzi katonânja tu ma singere i nja lâ pepa tini nana ngu ma sikatona, ande taine njinde ipa ngua kaika tu ma ikâe kilo tia.

ku sipanananzi tamâta ñana Maro Kindeni ne ilokalo. ¹⁸ Ñana tu Maro Kindeni kawa ñgua ikeno lâ pepa tini mine tu, “Miki ma kaponu bulmakao kawa lâ zo ñana ikai wurâta ñana ipopo kaniña karae piti, mine ndimo”. † Aku ñgua pinde kala keno mine tu, “Wurâta tamâta ma ikai ne kulu”. ¹⁹ Ambo tamâta taitu nâ iporo ñgua tu, “Katonâña ñinde nde iveta vetâña soki”, ande noko ma kalo tawana i ne ñgua ndimo. Taitu kulonjo ñga; ambo tamâta rua wa ñato siporo ñgua mine, ande ara, kulonjo nenzi ñgua sondu. ²⁰ Ambo katonâña tonje iveta kiesaka, ande ara ñana noko ma kulelea i ku kuveta ne ñgua sondu lâ kalo-tawana tamâta ndoni naonzi, ñana kinzi pinde ma siruru ñana siveta kiesaka mine kâ.

Paulo itu ñgua pa Timoti tu ma ipakatona sondu ñana i tamwata ne vetâña kâ

²¹ Lâ Maro Kindeni nao, anga lâ Yesu Kirisi nao, anga lâ kinzi anjelo naonzi, naña aporo ñgua kaika pano mine tu noko ma kupaveta kuku ñgua tukuña ñine. Noko ma kuveta vetâña kie taituni panzi tamâta rârâni. Noko ma kuveta vetâña tonje panzi tamâta ñalanjala wa ninambwe wa, anga kuveta vetâña tonje panzi tamâta pinde, mine ndimo.

²² Aku noko ma walele nâ kuo mbau lâ tamâta kulunzi ñana itula pwataki tu Maro Kindeni ipateanzi ñana siveta wurâta papa i kâ, mine ndimo. Ambo noko kutu nzâmbe pa tamâta tonje, andeta muli iveta kiesaka, ande ne kiesaka ñinde

† **5:18:** Lâ zo ñana bulmakao siveta wurâta ñinde, ande nenzi katonâña tamâta sisâu panzi tu sika kaniña pinde. Tia ma putole ipunzi, ku ma siveta wurâta ara tia.

ma imâ iloko lâ noko tini, aku ñinde ma ara tia ndo. Kupakatona tamwata sondo, ñana ma kumo mbâra-mbâra lâ Maro Kindeni naõ.

²³ Naña ilonngu tu noko ma kupile ne vetâña ñana kunu lââ kaa nâ. Ara ñana noko ma kunu lââ waini nuña mwata tona, ñana tu ñinde ma isukano ñana pukonja kie-kie ñinde uru ikeno pano ku iyaula noko kapwa.

²⁴ Tamâta pinde nenzi kiesaka nde ikeno nia yo, aku nenzi kiesaka ñinde nde ilâ pa Maro Kindeni ne ñgua nia imunnga panzi. Annga tamâta pinde nenzi kiesaka nde ikeno paveâña nâ, andeta muli nga nenzi kiesaka ñinde ma ipânnga nia yo. ²⁵ Aku mine nâ, tamâta nenzi vetâña ara uru ipânnga nia yo. Ambo tamâta pinde nenzi vetâña ara ipânnga nia yo walele tia, ande vetâña ara ñinde ma ikura tu ipavea zo rârâni kâ, ande tia. rârâni kâ, ande tia.

6

Paulo ñgere ñgua panzi tamâta uru siveta wurâta koa tia nâ panzi tamâta ñalañala

¹ Kalo-tawana tamâta pinde uru sikai wurâta koa tia nâ panzi tamâta ñalañala. Aku naña aporo ñgua ilâ pa kinzi ñinde mine tu ara ñana ma simege ñana nenzi koipu ku simo kalonzi. Ambo siveta mine, ande nenzi koipu ma sikura tu siporo ñgua potomule ñana Maro Kindeni wa nenda kalo-tawana wa, ande ma tia. ² Ambo wurâta tamâta kaa nâ tonje ne tamâta ñalae nde kalo-tawana tamâta, ande wurâta tamâta ñinde ma ilo mine tu, “Ñine nde niñgu-nambwe nâ; mine nde kalo loko, naña ma avaligi i ne ñgua”, mine ndimo. Ara ñana i ma ilo keno mine, “Tamâta ñjine kala aveta wurâta

papa nana asuka i kâ, i nde ninḡu-nambwe kalo-tawana tamâta; mine kala nana ma tiningu mwasa ndo papa i”. Ambo wurâta tamâta ilo keno mine, ande i ma iveta wurâta ara ndo papa. Noko ma kupanananzi ku kuporo nḡua kaika panzi mine.

Vetâna nana ilonda nḡalae pa mbaliḡa kâ, ande vetâna sakamao rârâni duvi

³ Nenda Maro Nḡalae Yesu Kirisi ne nḡua mao nde uru ipanana kindâ rârâni sondu nana Maro Kindeni ne ilo-kalo kâ. Ambo tamâta tonḡe ipile nḡua nḡinde, aku ipanananzi tamâta nana nḡua lanḡa pinde, ⁴ ande tamâta nḡinde ipasuka tamwata tini nâ. I taḡa kaika nâ, aku isama sâ tonḡe tia. I ilo nḡalae koḡa nana ipawa nḡua kunzi tamâta kâ. Aku vetâna nḡinde uru iyaulanzi tamâta ilonzi kalonzi, kala sipadâda wa sipara wa situ tamâta nḡuananzi wa ilonzi sakamao nḡananzi tamâta pinde wa ⁵ sipawa nḡua nḡalae wa. Kinzi tamâta nḡinde nde kapa ndo, aku sisama nḡua mao tonḡe tia ndo. Kinzi ilonzi tu nenzi kalo-tawana ma isukanzi tu sipânḡa simo mbaliḡa warakanzi.

⁶ Andeta tia. Mao nâ, ambo kindâ tapaveta kuku vetâna ndia Maro Kindeni ilo papa nḡinde, ande kindâ ma ilonda yosi nana mbaliḡa kâ, ande tia. Ambo kindâ tamo mine, ande nḡinde itogo kindâ tamo mbaliḡa warakânda mine.

⁷ Kindâ tasama tu lâ zo nana tinânda sipagugua kindâ tapânḡa tâno kulu, ande kindâ tapânḡa tava tininda kaa nâ. Aku lâ zo nana tamâte, ande kindâ ma takai kelekele tonḡe iyoka ku kindâ, ande tia.

⁸ Mine kala, ambo kâpwa nḡa lalava ikeno pa kindâ, ande ara, kindâ ma tandeka ku taporo tu, “Nḡine

nde ikurana”. ⁹ Anğa tamâta ea ilonzi tu sigona mbaliņa rârâ, ande samâņa uru ipânğa panzi ku ikainzi kaika, itogo nimbu ikai nğoa mine. Aku ilonzi igagatinzi nana siveta vetâņa soki rârâ. Aku nğinde iveta ilonzi kalonzi ipânğa kapa ndo, kala si-payaula warakanzi ku simo sakamao ndo. ¹⁰ Nana tu vetâņa nana ilonda nğalae pa mbaliņa kâ, ande nğinde nde vetâņa sakamao rârâni duvi. Muņa tamâta pinde ilonzi nğalae ndo pa mbaliņa kâ, aku ilo-kalo nğinde izavarunzi ndo lâ. Mine kala sipile nenzi kalo tawana, aku sisânda malia nğalae tina kulu.

Ara nana kindi ma tamandi kaika ku takai via mao

¹¹ Anğa noko nde Maro Kindeni ne wurâta tamâta. Mine kala ara nana noko ma kupu muli pa vetâņa sakamao kie-kie nğinde, aku tini piti ndo nana. Kumandi kaika ku kuveta vetâņa rârâni Maro Kindeni ilo tu ma taveta. Noko ma kuveta vetâņa arara nâ, ikura kinzi kalo-tawana tamâta mao uru siveta mine. Kuo ne kalo-tawana ilâ sondo ndo pa Yesu Kirisi, aku tini mwasa nâ panzi tini pinde. Noko ma pwai wulitia nana ne wurâta kâ ndimo. Noko ma nao mwasa nâ panzi tamâta. ¹² Kinzi tamâta nana sipalilu sipopole kâ nde uru sipalilu kaika nâ. Aku mine nâ, ara nana noko ma kupalilu kaika nana pwai ne via mao nana ma kumo ara mine ku kumo nâ. Muņgani, lâ zo nğinde noko kumandi ku kutula ne kalo-tawana pwataki lâ tamâta rârâ naonzi, ande lâ zoni ndaina Maro Kindeni isarâwa pano tu pwai via nğinde. ¹³ Naņa aporo nğua kaika pano lâ Maro Kindeni Via Warika nao, anğa lâ Yesu Kirisi nao,

ina muŋga imandi kaika lâ Pontius Pilata nao ku itula ne kalo-tawana pwataki. Nanenġu ŋgua nde mine; ¹⁴ Noko ma pwoka tukuŋa ŋine muli. Ambo noko ma kumo sondo mine, ne soki tonġe tia, ande tamâta tonġe ma ikura ŋana iporo ŋgua sakamao tonġe ŋanano, ande tia. Noko ma kumo mine lee, ikura lâ zo muli ŋinde nenda Maro Ŋalae Yesu Kirisi ma itaulo imâ kilo. ¹⁵ Yesu Kirisi ma ipâŋga lâ zo tonġe nia ndoyo Maro Kindeni ipatea papa keno lâ. Kinda nenda paneâŋa wa ndekâŋa wa ilâ pa Maro Kindeni. I simbo nâ ikai Maro panzi tamâta rârâni lâ tâno ndoni. Imo Koipu Ŋalae panzi koipu ŋalaŋala rârâni, aku imo Maro Ŋalae panzi maro rârâni. ¹⁶ Maro Kindeni simbo nâ ikura ŋana imâte tia. I imo sinâla ŋalae ilo, aku tamâta tonġe ikura ŋana ilâ i tini laiti kâ, ande tia. Tamâta tonġe muŋga imora i nao, ande tia, aku tamâta tonġe ikura ŋana imora i nao kâ, ande tia. Ikura zo zo, nenda paneâŋa ilâ papa i simbo nâ. I nde Walo Tamwata, uru imo mine ku imo nâ. Mao.

Paulo ipainzi mbaliŋa warakanzi tu ma kalonzi tawana Maro Kindeni ku sivilanzi tininzi pinde

¹⁷ Noko ma kuporo ŋgua kaika panzi tamâta simo mbaliŋa warakanzi lâ tâno ŋine kulu tu kinzi ma sipasuka warakanzi ŋanzi kâki ndimo. Aku kupainzi tu ma sio nenzi kalo-tawana ilâ pa kelekele uru nao tia walele nâ, mine ndimo. Kuporo ŋgua kaika panzi tu ma kalonzi tawana Maro Kindeni mao nâ, ŋana tu i uru kelekele arara kie-kie ilua kinda ŋana takai ku tandeka kâ. ¹⁸ Noko ma kupainzi tu ma siveta vetâŋa arara kie-kie ŋana sivilanzi tininzi pinde kâ. Nenzi vetâŋa ara ŋinde

nâ nde itogo nenzi mbaliŋa mao. Ara ŋana kinzi ma sindeka ŋana kelekele rârâ silanzi sugorai tamwatanzi. ¹⁹ Ambo kinzi ma siveta vetâŋa mine, ande ŋinde itogo sigona mbaliŋa rârâ ŋana isuka warakanzi lâ zo muli. Mine kala kinzi ma sikura tu sisaŋa via mao kaika.

Paulo itu ŋgua kulu pa Timoti tu ma ikatona ne wurâta sondo

²⁰ Timoti, Maro Kindeni muŋga ipatea wurâta ŋinde pano. Mine nde ara ŋana noko ma pwatona wurâta ŋinde sondo. Ambo ŋgua tonje iyoke Maro Kindeni kawa ŋgua tia, ande kupu muli pa ŋgua laŋeŋa potomule ŋinde. Ambo tamâta kapa pinde ma situla ŋgua laŋeŋa ku siporo tu, “Ŋine nde ilo-kalo ara”, ande noko ma kupu muli papa ŋgua ŋinde tona. ²¹ Muŋga tamâta pinde kalonzi tawana Yesu Kiriŋi, andeta muli, ŋineŋga sipile nenzi kalotawana ku sipono muli pa ilo-kalo soki ŋinde.

Maro Kindeni ne wisi-wisi imo kumi.

MARO KINDENI KAWA NGUA
The New Testament and Psalms in the Sio Language of
Papua New Guinea
Nupela Testamen long tokples Sio long Niugini

copyright © 1995 Wycliffe Bible Translators, Inc.

Language: Sio

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-08

PDF generated using Haiola and XeLaTeX on 11 Nov 2022 from source files dated 9 Oct 2020

21a9f7d3-4b3e-512c-ab21-eb25ed7aef4f